

## Uunga

## Allannguutissatut siunnersuut

**Uunga siunnersuut: Nalunaarasuartaatitigut attaveqatigiinneq aamma  
nalunaarasuartaatitigut sullissinerit pillugit Inatsisartut inatsisissaat nr. xx, xx. 2017-  
imeersoq**

Pingajussaaneerinermit Sanaartornermut ataatsimiititaliamit saqqummiunneqartoq.

## § 2-mut

1. § 2 ima oqaasertalerneqassaaq:

” § 2. Kisermaassinermut § 1, imm. 1-imi taaneqartumut ammanerulersitsineq pillugu Naalakkersuisut aalajangiisinnaapput.

*Imm. 2.* Nalunaarasuartaateqarnermi kiffartuussiviit uku ammanerulersinneqarput :

- 1) Paasissutissat ingerlaarnerinut kiffartuussivik.
- 2) Internetimik kiffartuussivik.
- 3) Radiukkut TV-kullu aallakaatitanik siaruarterineq.

*Imm. 3.* Nalunaarasuartaateqarnermik attaveqatigiinnermi atortut uku ammanerulersinneqarput:

- 1) Silaannakkut aallakaatitsinermit attaveqatigiinnermut atortut.
- 2) Radiukkut TV-kullu aallakaatitanik satellitikkut tigooraasinnaanermut attaveqatigiinnermut atortut.
- 3) Illoqarfiit nunaqarfiillu akornanni radiukkut TV-kullu aallakaatitat aallakaatinnissaannut attaveqatigiinnermut atortut.
- 4) Radiukkut TV-kullu aallakaatitat siaruarternissaannut attaveqatigiinnermut atortut.

*Imm. 4.* Imm. 1-imi nalunaarasuartaatitigut atortut, pilersuisut atuisullu akornanni attaveqaatit naapiffiisa (nettermineringspunkt) akornanni imaluunniit illoqarfiit nunaqarfiillu akornanni aammalu nunanut allanut atortut elektroniskiusut atorlugit attaveqatigiinnissamik ajornarunnaarsitsisut pineqanngillat.

*Imm. 5.* Naalackersuisut nalunaarasuartaatitigut attaveqarnermut imm. 4-mi taaneqartut ammanerulersinneqarnissaannik aalajangiisinnaapput, tassani teknologi pineqartoq silaannakkut aallakaatitsissutit atorlugit nuussisarneq aallaavigineqarpat, aammalu taamaallaat illoqarfiit imaluunniit nunaqarfiit ataasiakkaat iluanni atorneqartussatut naatsorsuussaappata. Ammanerulersitsinissaq aalajangiunneqarpat Nalunaarasuartaateqarnermi Aqutsisut (Telestyrelsen) pisuni immikkut ittuni teknologimi pineqartut atortut kabelillit atorlugit atuinissamut akuersissuteqarsinnaapput.

*Imm. 6.* Naalackersuisut nalunaarasuartaatitigut kiffartuussinerit aamma nalunaarasuartaatitigut attaveqaatit ammanerulersinneqartut pillugit maleruagassanik aalajangersaassapput.”

Allannguutissatut siunnersuummut oqaaseqaatit

### **Nassuiaatit nalinginnaasut**

Nalunaarasuartaatitigut attaveqaqatigiinneq aamma nalunaarasuartaatitigut sullissinerit pillugit Inatsisartut inatsisissaattut siunnersuut ull. 2. oktober 2017 siullermeerneqarpoq. Siullermeerereerternermi inatsisissatut siunnersuut Sanaartornermut ataatsimiititaliamit suliarisassanngortinneqarpoq, ataatsimiititaliarlu aappassaaneerinissami atugassamik isumaliutissiisumminik saqqummiussaqqarpoq. Isumaliutissiisummi Naalackersuisut ataatsimiititaliamit kaammattorneqarput, radiukkut TV-kullu siaruarterisarneq pillugu periaaserisartakkat atuutereersut pillugit ilanngussinissamut allannguutissatut siunnersuummik saqqummiussissasut. Tamatuma saniatigut ataatsimiititaliap maluginiaqquaa § 36-mi aalajangersakkamik amigaateqartoqarunarmat, tassanilu pineqarput sinaakkutit il.il. siusinnerusukkut inatsisitigut tunngavilereernejarsimasut.

Sanaartornermut ataatsimiititaliap siunnersuummik suliareqqiinermini maluginiarpaa oqaatsit sisamat § 2, imm. 1-imi ilaatinneqartut aalajangersakkap angusinnaasaanik siunertaanngitsumik killiliisuusoq.

Taamaalilluni aalajangersakkap allaqqinnissaa pisariaqarnera tunngavigalugu ataatsimut ingerlaarnermut tunngasut siusinnerusukkut oqaatigineqarsimasut ataatsimiititaliap aamma peersimavai, taakkumi UKA 2017/29-ip suliarinerani Unammilleqatigiinneq pillugu Inatsimmut nuunneqarnikuummata.

Nuussineq taanna naapertorlugu allannguutissatut siunnersuut una Atuisartoqarnermut Unammilleqatigiinnermullu Aqutsisoqarfimmut pilertorluinnartumik tusarniaassutigineqarpoq. Atuisartoqarnermut Unammilleqatigiinnermullu Aqutsisoqarfik nalunaarpoq, taama sivikitsigsumik piffissaliineq pissutigalugu itisiliinissamut periarfissaqannginnerarluni,

tuaviortumilli iliuuseqarnikkut Aqutsisoqarfik siunnersuummut oqaaseqaatissaqarsimanngilaq.

### **Allannguutissatuut siunnersuutip aalajangersartagaannut ataasiakkaanut nassuiaatit**

#### Normu 1-imut

##### Imm. 1-imut

Kalaallit Nunaanni Namminersorlutik Oqartussat kisermaassisussaataitaneranni immikkoortut ilaannik ammanerulersitsinissamik Naalakkersuisut aalajangersakkakut piginnaatinneqarput.

##### Imm. 2-mut

Nalunaarasuartaateqarnermik peqqussummi atuuttumi § 2, imm. 1 innersuussutigalugu nalunaarasuartaateqarnermi kiffartuussivinni paasissutissat pillugit kiffartuussiviit aamma internetimik kiffartuussiviit pillugit nioqquteqarnermi niuernerit Naalakkersuisut 2009-mi 2014-imilu aalajangiinerisigut ammanerulersinneqarput.

Inatsisissap uuma akuersissutigineqarneratigut nalunaarasuartaateqarnermi kiffartuussivik radiukkut TV-kullu aallakaatitat ammanerulersinneqarpoq. Nalunaarasuartaateqarnermik kiffartuussivik radiukkut TV-kullu aallakaatitat sumiiffimmiit ataatsimit (napparummiit) tiguisissanut arlalinnut siaruarsinnaanerit (broadcast) periarfissaalerpoq. Matumani pineqarpoq immikkoortumit ataatsimit immikkoortunut amerlasuunut nalunaarasuartaateqarnikkut kiffartuussineq.

Ukiuni arlaqartuni ileqquusimavoq taamatut siararterisarnermik kiffartuussiviup najukkami radioqarfinit TV-qarfinnillu akuersissutaatilimmit pisiarisarnera, amerlanerujartuinnartulli taamatut kiffartuussivimmit namminneq nioqquteqartalersinnaanissartik kissaatigaat. Siunnersuutikkut ileqqoq tamanna inatsisitigut tunngavissinneqarpoq.

##### Imm. 3-mut

Nalunaarasuartaateqarnermik attaveqaqatigiinnermi silaannakkut aallakaatitsinnermut atortunik nioqquteqartarnerit Naalakkersuisut 2009-mi aalajangiinerisigut ammanerulersinneqarput. Attaveqaqatigiinnermi atortut nioqquteqartup atuisullu akornanni attaveqarsinnaanermut atorneqassapput. Matumani pineqartut assersuutigalugu tassaapput attaveqaatit wifi, Wimax, FWA, 4G imaluunniit 5G. Attaveqaqatigiinnermi atortut assissutigaat, paasissutissat sumiiffiit marlut akornanni nassiunneqarsinnaassammata, assersuutigalugu nioqquteqartumiit napparut nassitsissut atorlugu, pisisumiillu tigooraavik atorlugu.

Inatsisissap uuma akuersissutigineratigut nalunaarasuartaateqarnermik kiffartuussineq radiukkut TV-kullu aallakaatitanik siararterineri nioqquteqarneq nalunaarasuartaateqarnermi attaveqaataasoq ammanerulersinneqarpoq. Matumani pineqarpoq satellitti aqqutigalugu attaveqaqatigiinneq, tassuunakkullu radiukkut TV-kullu aallakaatitanik tigooraasinnaaneq

periarfissiissutigineqarpoq. Nalunaarasuartaateqarnermi attaveqaateqarnikkut radiukkut TV-kullu aallakaatitanik illoqarfimmiit nunaqarfimmiilluunniit illoqarfimmut nunaqarfimmulluunniit allamut nassitsisinnaaneq periarfissaalerpoq. Kiisalu attaveqaqatigiinnermi atortut atorlugit illoqarfiit nunaqarfiilluunniit ataasiakkaat iluanni aallakaatitanik siaruarterisinnaaneq.

Ukiuni arlaqartuni ileqquunikuuvoq radiukkut TV-kulluunniit aallakaatitanik tiguisinnaanissamut najukkami radioqarfiit TV-qarfiillu tigooraanerannut kiisalu illoqarfiup nunaqarfiullu akornanni aallakaatitanik nassiussuinerannut satelittikkut tigooraassutinik atortuutinik pilersitsisarnerat ingerlataqartarneralluunniit. Siunnersuutikkut ileqqoq tamanna inatsisitigut tunngavissinneqarpoq.

Imm. 4-mut

Aalajangersakkami erseqqissaatigineqarpoq imm. 1 naapertorlugu attaveqaqatigiinnermi atortut tassaasut radiumut sakkortusaaviit (radiokæder), satellitumut attaveqaatit, kabelitigut aamma paasissutissat ingerlaarnerinut kiffartuussiviit ammanerulersitsinermik periarfissaqarnermut ilaatinneqanngitsut. Elektronik atorlugu attaveqarnerit tassaapput radiukkut nalunaarasuaatitigulluunniit attaveqaateqarnermi teknikki imaluunniit pilersuisut atuisullu akornanni attaveqaatit naapiffii (nettermineringspunkter) iluaqusiullugit nipimik, assinik, oqaasertaliussanik imal. taakku ataatsikkut paarlakaajaallugit atornerisigut elektroniskiusumik tamakkiisumik ilaannakortumilluunniit nassiussisinnaaneq.

Imm. 5-imut

Aalajangersakkami illoqarfiup nunaqarfiilluunniit iluani silaannakkut attaveqaatinik atuinissamik ammanerulersitsinissamut Naalakkersuisut aamma piginnaatinneqarput. Illoqarfiit nunaqarfiillu akornanni silaannakkut attaveqaatit atornissaannut ammaassinissamut periarfissaqartoqarnaviannngilaq. Tamatumani attaveqaqatigiinnissamut akuersissutaateqareersoq atorneqassaaq.

Nioqquteqartartup silaannakkut attaveqaammik nammineerluni pilersitsisinnaaneranut piumasqaatit marluupput. Siullertut pineqartoq tassaassaaq sumiiffimmiit sumiiffimmut imaluunniit sumiiffimmiit sumiiffinnut arlariinnut silaannakkut attaveqaat. Pissutsit immikkut ittut pineqanngikkaangata fiberimik kabelimilluunniit attaviliisoqarsinnaanngilaq, taamaaliortoqassappallu Nalunaarasuartaateqarnermik Aqutsisoqarfiup immikkut ittumik akuersissut nalunaarutigissavaa. Aappaattut silaannakkut attaveqaat illoqarfiup nunaqarfiilluunniit iluani taamaallaat pilersinneqarsinnaavoq. Tamatumani tunngaviuvoq nalunaarasuartaateqarnikkut attaveqarnermik attaveqaqatigiinnermut inuiaqatigiinnit aningaasaliissutaareersimasut pitsaanerpaamik atorneqarsinnaaner at eqqarsaataasariaqarmat.

Suliffeqarfiup namminerisamik attaveqaataasa imminnut ataqatigiilersinnaaner at siunertaralugu assersuutigalugu suliffeqarfik illuni sanilerinni inissisimappat illut marlut akornanni kabelinik attaveqaasorsinnaaneq periarfissaavoq, pissutsinilu taamaattuni kabelit atorlugit attaveqaammik pilersitsinissamut immikkut ittumik akuersissuteqartoqarsinnaavoq. Illoqarfimmi

nunaqarfimmiluunniit pineqartumi suliffeqarfiup arlariinnik illuuteqarnera pissutiginnarlugu attaveqaqatigiinnermut atortunik annertuunik pilersitsinissamut taamaalilluni immikkut ittumik akuersissummik tunniussisoqarsinnaassanngilaq.

Ataatsikkut illoqatigiittoqartillugu, nioqquteqartartut allat akuersissutaateqartup illuutaani atortunik inissiimatillugit, kabeli atorlugu attaveqaasiisinaanermut immikkut ittumik akuersissummik aamma tunniussisoqarsinnaavoq.

Imm. 6-imut

Ammanerulersitsineq pillugu Naalakkersuisut annertunerusumik maleruagassiorsinnaanerannik aalajangersagaq kinguneqassaaq. Assersuutigalugu makku pillugit maleruagassiorqarsinnaavoq:

- Nioqquteqartartup nalunaarasuartarnermut attaveqaataanik atuinissanut maleruagassanik aalajangersaasoqarsinnaavoq
- Normuutigineqartunut ataatsimoorussanut killilinnullu periarfissaqarnermi aqutsinerup killiliinerulluunniit isumannaarneqarnissaa.

Taagorneqartut tamarmiunngillat.

Allanguinermi niuernerit tamakku killilersorneqarnerat Atuisartoqarnermut Unammilleqatigiinnermullu Aqutsisoqarfimmut Unammilleqatigiinneq pillugu inatsit naapertorlugu nuunneqarsimmamata, inatsit una malillugu peqatigiilluni ataatsimut atuisitsinnaatitsinermut aamma internetimut periarfissaqarnermut Naalakkersuisut maleruagassanik aalajangersaanngillat.